

06 MAY 1996

Mahathir-RMK7 (Belia)

JAWATANKUASA PERINGKAT TINGGI AKAN DIBENTUK ATASI GEJALA SOSIAL

KUALA LUMPUR, 6 Mei (Bernama) -- Kerajaan akan menubuhkan satu jawatankuasa peringkat tinggi bagi merangka dasar dan strategi meningkatkan pembangunan sosial dan keluarga, kata Perdana Menteri Datuk Seri Dr Mahathir Mohamad.

Langkah itu bagi mengatasi masalah-masalah sosial yang boleh melemahkan moral generasi akan datang, katanya ketika membentangkan usul Rancangan Malaysia Ketujuh persidangan Dewan Rakyat hari ini.

Menurutnya, proses perindustian dan urbanisasi yang pesat telah meningkatkan gejala sosial negatif seperti penagihan dadah, penderaan kanak-kanak, masalah lepak, keruntuhan akhlak juvana dan gaya hidup tidak sihat yang boleh menimbulkan keretakan rumah tangga.

Selain menubuhkan jawatankuasa itu, beliau berkata institusi-institusi sokongan juga akan dikaji semula untuk meningkatkan tumpuan dan penyelarasan kepada program pencegahan dan pemulihan untuk golongan sasaran seperti kanak-kanak, belia dan ibu bapa.

Mengenai pembangunan belia, yang merupakan satu teras pembangunan RMK7, beliau berkata tumpuan diberikan untuk membentuk generasi belia yang bukan sahaja berpendidikan dan berkemahiran tetapi bermoral tinggi.

Katanya, Program Rakan Muda akan diteruskan oleh kerajaan dengan kerjasama sektor swasta dan pertubuhan bukan kerajaan (NGO).

Dasar Belia Negara akan dikaji semula dengan memberi tumpuan kepada belia bermasalah dan mereka yang menganggur untuk menjadikan mereka tenaga kerja yang lebih produktif dan warganegara yang baik, katanya.

Mengenai usaha menggalakkan pembangunan masyarakat penyayang, Dr Mahathir berkata majikan akan digalakkan menyediakan kemudahan seperti pusat penjagaan bayi dan kanak-kanak memandangkan bilangan ibu bapa yang bekerja semakin meningkat. -- BERNAMA

AZZ NMO